

**Wan Azizah dicabar jelas siapakah wanita dimaksudkan
Utusan Online
04 April, 2012**

KUALA LUMPUR 3 April - Ahli perniagaan, Ummi Hafilda Ali mencabar Presiden Parti Keadilan Rakyat (PKR), Datin Seri Dr. Wan Azizah Ismail supaya mempertahankan keperibadian Shamsidar Taharin jika benar isteri Timbalan Presiden PKR itu difitnah melalui pendedahan beliau dan Senator Datuk S. Nallakaruppan baru-baru ini.

Dalam nada sinis, Ummi Hafilda turut bertanya kepada isteri Datuk Seri Anwar Ibrahim itu siapa yang dimaksudkannya apabila menyebut 'perempuan sundal dan jalang'.

Beliau berkata, gelaran yang pernah digunakan oleh Wan Azizah itu bukan sesuatu yang rahsia malah kerap digunakan dalam perbualan bersama bekas Ahli Parlimen PKR, Zulkifli Nordin dan bekas pemandu Wan Azizah, Azizan Abu Bakar.

"Kenapa ketika itu dia sanggup menggelarkan Shamsidar dengan gelaran seburuk itu? Jadi saya cabar Wan Azizah jawab soalan cepu emas ini. Adakah Shamsidar seorang muslimah sejati yang telah difitnah sebegitu zalim?"

"Jika saya tidak berpeluang untuk bertanya kepada beliau, awak wartawan tolong tanya dan lihat sendiri jika air mukanya tidak berubah," katanya kepada *Utusan Malaysia* di sini hari ini.

Ummi Hafilda mendakwa, walaupun kedua-dua mereka tampil dengan imej seperti tidak bermusuhan di khalayak ramai, perselisihan antara Wan Azizah dengan Shamsidar tidak pernah reda sejak 1997.

"Pada hari raya sekalipun, Shamsidar tidak datang ke rumah Anwar. Kalau ada Azmin datang hanya bersama anak-anaknya."

Dakwaan itu turut disusuli cabaran kedua Ummi yang mahu melihat Wan Azizah mempertahankan suaminya dalam kes Shamsidar.

"Dalam kes liwat dan macam-macam lagi dia akan lawan habis-habisan, tapi kenapa dalam kes Shamsidar, Wan Azizah akan terus diam seribu bahasa," katanya.

Ditanya mengenai gambar yang boleh mengaitkan hubungan Shamsidar dengan Anwar, Ummi mendakwa masih menyimpan gambar tersebut dan akan mendedahkannya menjelang pilihan raya.

Daripada intipan yang dilakukan pada 30 Jun 1997 itu beliau mendakwa melihat Shamsidar dan Anwar dalam keadaan yang mencurigakan.

Menurut Ummi, bukti salah laku itu turut dihantar kepada Tun Dr. Mahathir Mohamad selaku Perdana Menteri ketika itu.

Source:

http://www.utusan.com.my/utusan/info.asp?y=2012&dt=0404&pub=Utusan_Malaysia&sec=Politik&pg=po_02.htm